

COMISIÓN INFORMATIVA DE COOPERACIÓN, INFRAESTRUTURAS E MEDIO RURAL

ACTA da mencionada comisión informativa, correspondente ao día **19 de abril de 2023**

Ás 17.45 horas do día 22 de marzo de 2023, reúnese a comisión informativa de Cooperación, Infraestruturas e Medio Rural, na sala de xuntas da Deputación Provincial, coa asistencia dos seguintes deputados e deputadas:

Presidente: D. Pablo Pérez Pérez

Deputados/as do Grupo Popular:

D.^a Ana Patricia Torres Madureira

D.^a Álvaro José Fernández López

D.^a María Consuelo Vispo Seara

D.^a Ana María Villarino Pardo

Deputados/as do Grupo Socialista:

D.^a Elvira Lama Fernández

D. Aurentino Alonso Araújo

D.^a Rosario Rodríguez Delgado

Deputado de Democracia Ourensana: D. Armando Ojea Bouzo

Deputado do BNG: D. Bernardo Varela López

Deputada non adscrita: D.^a Montserrat Lama Nóvoa

Secretario: D. Juan Marquina Fuentes

Interventora: D.^a Begoña Álvarez Matos

Non asisten os deputados do Grupo Popular, don Miguel Antonio Cid Álvarez (substituído por dona María Consuelo Vispo Seara), nin don Jorge Pumar Tesouro (substituído por dona Ana María Villarino Pardo).

Seguidamente, iniciouse o tratamento dos asuntos incluídos na orde do día, do xeito que se reflicte a continuación:

1º.- APROBACIÓN DA ACTA DA SESIÓN ANTERIOR, CORRESPONDENTE Á ORDINARIA DO DÍA 22 DE MARZO DE 2023.-

Pola Secretaría Xeral deuse traslado do borrador da acta anterior, correspondente á ordinaria do día 22 de marzo de 2023.

Non se producen intervencións e por unanimidade a comisión adopta o seguinte acordo:

Aprobar a acta da sesión ordinaria da Comisión Informativa de Cooperación, Infraestruturas e Medio Rural do día 22 de marzo de 2023, conforme co borrador elaborado pola Secretaría Xeral.

2º.- CONVALIDACIÓN DO ACORDO DO CAMBIO DO MODO DE XESTIÓN DO SERVIZO PÚBLICO INTERMUNICIPAL DELEGADO DE RECOLLIDA E TRATAMENTO DE RESIDUOS SÓLIDOS URBANOS (RSU) DA DEPUTACIÓN PROVINCIAL DE OURENSE ADOPTADO NA DATA 25.02.2022.

O Sr. secretario expón o contido da proposta.

D. Bernardo Varela López, do BNG, entende que a causa que leva a traer novamente este expediente ao pleno é bastante estraña, pero que en todo caso hai que contestar a alegación presentada en prazo e que está sen contestar. Engade que o seu grupo vai manter a mesma postura que no acordo no que se aprobou o cambio do modo de xestión.

Non se producen máis intervencións e co voto favorable do Grupo Popular (5) e da deputada non adscrita, e a abstención do Grupo Socialista (3), de DO (1) e do BNG (1), a comisión ditamina favorablemente a adopción, por parte do Pleno, do seguinte acordo:

1º. Desestimar, polos motivos que constan no informe realizado pola Área de Medio Ambiente da Deputación de data 13.04.2023 (o cal consta incorporado ao expediente no documento electrónico con CSV:14614150016306236247), e que serve de sustento argumental ao presente acordo, o escrito de alegacións presentado pola representación da organización sindical CSI-F con NRE 2850 e data de entrada no rexistro xeral 20.01.2022.

2º. Convalidar o acordo plenario de data 25.02.2022 de ratificar a consideración de que a forma máis adecuada para a prestación do servizo público intermunicipal delegado de recollida e tratamento de residuos sólidos urbanos (RSU) da Deputación Provincial de Ourense, polos motivos acreditados no expediente de referencia, é a de xestión indirecta, a cal deberá prestarse a través das formas previstas na Lei 9/2017 de contratos do sector público: contrato de servizos con prestación directa a favor da cidadanía, ou contrato de concesión de servizos.

3º. Convalidar o acordo plenario de data 25.02.2022 de aprobar definitivamente a modificación do modo de xestión do servizo público intermunicipal delegado de recollida e

tratamento de residuos sólidos urbanos (RSU) da Deputación Provincial de Ourense, pasando de xestión directa a xestión indirecta, de acordo coa memoria xustificativa e demais documentación incorporada ao expediente de referencia 2021/14562S.

3º.- BASES REGULADORAS E CONVOCATORIA EXTRAORDINARIA DO PROGRAMA EMERGOU - PROGRAMA PROVINCIAL DE COOPERACIÓN COS CONCELLOS PARA PALIAR OS DANOS DAS RECENTES INUNDACIÓNS EN INFRAESTRUTURAS MUNICIPAIS DA PROVINCIA DE OURENSE.-

O **presidente da comisión** expón o contido da proposta e das emendas presentadas.

D. Bernardo Varela López, do BNG, formula dúas dúbidas ao respecto. En primeiro lugar pide que se revise a previsión que hai respecto aos datos de 50l/m² de precipitacións o día 1 de xaneiro, para evitar que ningún concello dos afectados quede fóra por esta circunstancia. En segundo lugar pregunta se serían financiáveis obras xa executadas e se sería posible recoller varias actuacións nun único proxecto.

O **presidente da comisión** contesta que se revisará a referencia á cantidade de precipitacións do día 1 de xaneiro de 2023 e que as dúas cuestións formuladas polo BNG serían financiáveis de acordo coas bases.

D. Aurentino Alonso Araújo, do Grupo Socialista, indica que a previsión que contén as bases respecto aos datos de precipitacións ao día 1 de xaneiro é tremendamente inxusto xa que a parte oriental da provincia quedaría fóra deste programa. A continuación expón os datos oficiais das 34 estacións meteorolóxicas de Meteo Galicia, e en particular as relativas aos días 12 de decembro de 2022, 1 de xaneiro de 2023 e 16 de xaneiro de 2023. Engade que en todas elas se produciron desbordamentos e danos en infraestruturas municipais e que as bases non amparan á totalidade dos concellos afectados, polo que pide a súa revisión para evitar que ningún dos concellos afectados, independentemente do día do desbordamento, quede fóra do programa.

O **presidente da comisión** di que por parte dos técnicos da Deputación se revisará o programa no sentido indicado.

Non se producen máis intervencións e co voto favorable do Grupo Popular (5) e da deputada non adscrita e a abstención do Grupo Socialista (3), de DO (1) e do BNG (1), a comisión ditamina favorablemente a adopción, por parte do Pleno, do seguinte acordo:

1º.- Aprobar inicialmente as bases reguladoras e convocatoria extraordinaria do programa EmergOU - programa provincial de cooperación cos concellos para paliar os danos das recentes inundacións en infraestruturas municipais da provincia de Ourense, co seguinte teor literal:

1ª) Obxecto:

Constitúe o obxecto das presentes bases a regulación do Programa provincial de cooperación cos concellos para a recuperación de infraestruturas e instalacións municipais de especial sensibilización para a cidadanía, sempre e cando sexa xustificable que estas foron afectadas por emerxencias acontecidas durante as riadas e inundacións que tiveron lugar entre o 26 de decembro de 2022 e 1 de xaneiro de 2023.

Non serán subvencionables as actuacións que non garden unha relación directa cos danos ocasionados polas ditas inundacións.

A finalidade deste Programa é subvencionar actuacións de recuperación de infraestruturas de competencia municipal danadas polos efectos das extraordinarias precipitacións acumuladas ao longo do mes de decembro de 2022 na provincia de Ourense e que terminaron por provocar situacións de emerxencia nos concellos debido ás consecuentes riadas e inundacións entre o 26 de decembro e o 1 de xaneiro de 2023. A entidade beneficiaria deberá dispoñer da titularidade municipal dos bens, infraestruturas, instalacións ou equipamentos sobre os que se realizasen as devanditas actuacións de recuperación.

2ª) Beneficiarios. Gastos subvencionables.

1. Poderán obter subvención no marco do programa regulado nas presentes bases os concellos da provincia de menos de 20.000 habitantes nos que, segundo datos de Meteogalicia, se rexistrasen máis de 50 l/m² de chuvia ao 1 de xaneiro de 2023, causando emerxencias e consecuentes danos en infraestruturas ou instalacións municipais nas que foron precisas actuacións de acondicionamento, reparación, limpeza e retirada de materiais, mellora, reconstrución e/ou reparación.

2. Terán a consideración de proxectos subvencionables todos os que, tendo este carácter conforme coa lexislación vixente en materia de subvencións, financiasen cun importe mínimo de 50.000 € as anteditas actuacións para a recuperación de infraestruturas de titularidade municipal afectadas polas recentes inundacións acontecidas na provincia de Ourense a finais de 2022.

3ª) Disponibilidades orzamentarias:

O financiamento das subvencións reguladas no presente Programa realizarase con cargo á aplicación 450.12/762.00 dos orzamentos da Deputación Provincial de Ourense para o exercicio 2023 (MC 2/2023). A contía total máxima estimada é de 500.000,00 €.

4ª) Contía das subvencións

Cada concello adherido disporá dunha axuda máxima por importe de 25.000,00 € e ata o 40% do custo total do proxecto, requirindo un investimento mínimo no proxecto de 50.000,00 €. Cada concello poderá presentar un único proxecto con todas as actuacións realizadas sobre esa infraestrutura motivo de reparación.

5ª) Adhesión ao programa e solicitudes de subvención: prazos, lugar de presentación e documentación a presentar:

As resolucións de adhesión ao programa -que inclúen as solicitudes de subvención- suscritas polo alcalde ou representante legal interesado, ou concelleiro no que delegue, irán dirixidas á Presidencia da Deputación Provincial e deberán presentarse no Rexistro Electrónico Xeral da Deputación, ou en calquera dos lugares previstos no artigo 16.4 da Lei 39/2015, de 1 de outubro, do procedemento administrativo común das administracións públicas, consonte co modelo que se achega como anexo I a estas bases.

O prazo de presentación será dun mes, contado a partir do día seguinte ao da data de publicación das presentes bases no Boletín Oficial da Provincia. O dito prazo terá carácter improrrogable.

As solicitudes irán acompañadas da declaración do conxunto de axudas ou subvencións públicas solicitadas pola entidade ou que lle fosen concedidas para o financiamento das actuacións para as que se solicita subvención que se presentará consonte como modelo que achégase como anexo II a estas bases e do informe do técnico municipal sobre o sinistro acontecido na infraestrutura motivo de recuperación, data, actuacións executadas e custo total do proxecto, modelo que se achegase como anexo III.

Serán subvencionables varias actuacións, que deberán relacionarse nunha única solicitude. Na devandita solicitude deberá especificarse cada actuación por separado, con indicación expresa da tipoloxía do gasto (investimento ou gasto corrente).

No suposto en que o número de solicitudes exceda as disponibilidades orzamentarias, a Presidencia concederá as subvencións baseándose nos seguintes criterios: orzamento do proxecto e poboación municipal a 1 de xaneiro de 2022 segundo datos do IGE (Instituto

Galego de Estatística).

O investimento realizado terá unha puntuación de 0 a 70 puntos, outorgándose 70 puntos á solicitude que conte cun maior investimento no proxecto de recuperación, e aos demais, a puntuación segundo resulte da aplicación dunha regra de proporción directa (regra de 3):

$$\text{Puntuación solicitude "A"} = \frac{\text{orçamento proxecto A x 70 puntos}}{\text{Maior orçamento nas solicitudes presentadas}}$$

Maior orçamento nas solicitudes presentadas

A poboación municipal terá unha puntuación de 0 a 30 puntos, outorgándose 30 puntos á solicitude do concello que conte cunha menor poboación, e aos demais, a puntuación segundo resulte da aplicación dunha regra de proporción inversa (regra de 3):

$$\text{Puntuación solicitude "A"} = \frac{\text{Menor poboación municipal x 30 puntos}}{\text{Poboación de A}}$$

No caso de producirse remanentes de tesourería, a Presidencia, sen necesidade de proceder a unha nova convocatoria, poderá acordar a concesión da subvención que proceda ao seguinte ou seguintes solicitantes que non lograsen acadar a puntuación necesaria para obter subvención na presente convocatoria.

6º) Procedemento de concesión.

As solicitudes presentadas remitiráselle ao Servizo de Investimentos, Contratación e Patrimonio da Deputación, para a instrución do expediente.

Unha vez examinada a documentación, a Presidencia poderá conceder un prazo de ata dez días hábiles para a emenda de deficiencias materiais na documentación presentada.

Comprobada a regularidade do procedemento seguido e a corrección da documentación presentada, aplicaranse criterios de valoración económicos e de poboación para a selección dos proxectos subvencionables, tendo prioridade aqueles que conten cun maior investimento, e unha menor poboación, ata completar o crédito dispoñible.

Unha vez seleccionados os proxectos, mediante resolución da Presidencia autorizarase a adhesión das entidades solicitantes ata esgotar a dotación económica estimada para este programa, agás nos seguintes casos:

a) Que a solicitude se formulase fóra de prazo.

b) Que a solicitude non reunise os requisitos establecidos na base 5ª, e non se emendasen as deficiencias advertidas no prazo concedido.

7ª) Publicidade.

A resolución de concesión das subvencións adoptarase antes do 26 de maio de 2023 e será obxecto de publicación no Boletín Oficial da Provincia, con expresión dos beneficiarios e contía das axudas concedidas. Esta publicación substituirá á notificación individual para todos os efectos, ao abeiro do establecido no artigo 45.1.b) da Lei 39/2015, de 1 de outubro.

8ª) Xustificación da subvención:

Os concellos adheridos deberán ter executadas e pagadas as obras de recuperación da infraestrutura afectada polas inundacións antes de que remate o día 30 de setembro do presente ano. Este prazo terá carácter improrrogable, agás causas de forza maior debidamente acreditadas. En todo caso, a prórroga deberá solicitarse expresamente antes de que remate o día 30 de setembro de 2023 e poderá concederse, como máximo, ata o día 10 de outubro de 2023.

As entidades beneficiarias deberán xustificar a subvención ante a Deputación, antes de que remate o día 30 de novembro de 2023. Este prazo terá carácter improrrogable, agás causas de forza maior debidamente acreditadas. En todo caso, a prórroga deberá solicitarse expresamente antes de que remate o día 30 de novembro de 2023 e poderá concederse, como máximo, ata o día 10 de decembro de 2023.

A xustificación realizarase mediante a presentación dos seguintes documentos:

- A) Certificación expedida polo secretario da entidade en relación coas actas de: recepción, execución e pago da obra.*
- B) Contía do gasto subvencionable que foi obxecto de recoñecemento da obrigaón no exercicio 2023.*
- C) Importe das subvencións ou axudas públicas concedidas para o financiamento das actividades subvencionadas.*
- D) Certificación da conta corrente da entidade para a realización do pagamento da subvención.*
- E) Unha fotografía do cartel informativo ao que se refire a base 9ª, no que se reflecta a súa localización e a mención expresa ao financiamento por parte da Deputación de Ourense.*

Ao abeiro do establecido no artigo 31.2 da Lei xeral de subvencións, considerarase como gasto efectivamente realizado aquel cuxa obriga de pago fose contraída antes do vencemento do prazo de xustificación da subvención. En consecuencia, non será preciso acreditar a realización do pago no acto de xustificación.

Non obstante ao anterior, e no exercicio das súas facultades de control financeiro, a Intervención poderá realizar procedementos simplificados de control financeiro, consistentes en esixir, a partir do mes seguinte ao do pagamento da subvención, a acreditación do pago da totalidade dos gastos xustificadas. O incumprimento desta obriga dará lugar á obriga de reintegro por parte do beneficiario, así como a imposición das sancións que procedan.

Para considerar xustificada a subvención, os concellos deberán acreditar a realización e execución do proxecto por unha contía superior a 50.000,00 €.

A falla de xustificación en prazo dará lugar á perda total do dereito á subvención, que será declarada pola Presidencia.

A falla de xustificación da obriga de publicidade establecida na base 9ª dará lugar a unha redución do importe da subvención nun 20 %.

9ª) Obrigas dos beneficiarios:

Con carácter xeral, as entidades beneficiarias asumirán todas as obrigas impostas pola Lei xeral de subvencións. En particular, quedan suxeitos ás obrigas de control financeiro e reintegro nos casos previstos nestas bases e na lexislación vixente.

No lugar onde se realice o proxecto de recuperación ou reconstrución subvencionado deberá figurar, de xeito visible, un cartel informativo -no modelo normalizado que se publicará na web da Deputación - no cal constará o financiamento por parte da Deputación Provincial de Ourense.

10ª) Normativa supletoria:

De conformidade co establecido na Disposición adicional 8ª da Lei xeral de subvencións, esta lei será de aplicación ás subvencións reguladas nestas bases exclusivamente como norma supletoria, para integrar posibles baleiros de regulación, así como naqueles casos nos que as bases remiten á dita normativa.

ANEXO I

MODELO DE RESOLUCIÓN DE ADHESIÓN AO PROGRAMA DE COOPERACIÓN

Unha vez vistas as bases reguladoras do Programa provincial de cooperación cos concellos para a

recuperación de infraestruturas e instalacións municipais de especial sensibilización para a cidadanía danados durante as inundacións de 2022, e no uso das atribucións que me confire o ordenamento xurídico, dispoño:

1º) Aprobar a adhesión do Concello / Entidade de _____ ao Programa provincial de cooperación cos concellos para a recuperación de infraestruturas e instalacións municipais de especial sensibilización para a cidadanía danados durante as inundacións de 2022, solicitando a concesión dunha subvención por importe de euros.

2º) Asumir expresamente as obrigas que como beneficiario lle corresponden no programa de cooperación.

3º) Declarar que o Concello/ a Entidade de _____ non se atopa incurso en prohibición de obter subvencións da Deputación Provincial conforme co que dispón o artigo 13 da Lei xeral de subvencións, manifestando, igualmente, estar ao corrente das obrigas tributarias e de Seguridade Social.

Ourense, ____ de _____ de 202__

Asdo.: _____

SR. PRESIDENTE DA DEPUTACIÓN PROVINCIAL DE OURENSE.

ANEXO II

DECLARACIÓN AXUDAS

Don/Dona _____, alcalde do
Concello/presidente Entidade de _____, con CIF _____,

DECLARA

Non ter solicitada, nin en consecuencia, ter concedida, ningunha axuda para a _____ mesma finalidade, sexa pública ou privada.

Que presentou a/as solicitude/s e que lle foi/foron concedida/s, se é o caso, a/s seguinte/s axuda/s para a mesma finalidade:

Organismo ou entidade ao que	Data	Concesión*	Contía
------------------------------	------	------------	--------

<i>solicita</i>	<i>solicitude</i>		

**No caso de estar pendente a resolución dalgunha solicitude, indicarse "pendente" na columna.*

No caso de solicitudes denegadas, farase constar "denegada".

Ourense, ____ de _____ de 202_

Asdo.: _____

SR. PRESIDENTE DA DEPUTACIÓN PROVINCIAL DE OURENSE.

ANEXO III

DECLARACIÓN DO SINISTRO

Don/Dona _____, Técnico municipal

da Entidade de _____, con CIF _____, **DECLARA**

- Con data _____ tivo lugar o desbordamento do Río _____

- Descrición do sinistro (infraestruturas ou instalacións municipais afectadas):

- Para recuperar a zona afectada, foi necesario levar a cabo un proxecto que acadou o custe total de

_____, coa seguinte relación de actuacións:

<i>Actuacións levadas a cabo polo concello</i>	<i>Data inicio da actuación</i>	<i>Data fin da actuación</i>	<i>Tipoloxía de gasto (investimento)</i>	<i>Custe</i>

			<i>ou corrente)</i>	

No caso de actuacións non executadas, farase constar “non executada”.

Ourense, ____ de _____ de 202_

Asdo.: _____

SR. PRESIDENTE DA DEPUTACIÓN PROVINCIAL DE OURENSE.

2º.- Someter a trámite de información pública, mediante anuncio publicado no Boletín Oficial da Provincia de Ourense, as bases inicialmente aprobadas polo prazo de 10 días hábiles, conforme co establecido no artigo 10 da Ordenanza xeral de subvencións da Deputación Provincial de Ourense, durante os cales as entidades interesadas poderán formular as alegacións ou suxestións que consideren oportunas, que serán resoltas expresamente polo Pleno. No caso de non formularse alegacións en prazo, entenderase elevado a definitivo o acordo de aprobación provisional.

4º.- MOCIÓN DO BNG PARA A ELABORACIÓN DUN PLAN ÚNICO DE COLABORACIÓN COS CONCELLOS DA PROVINCIA DE OURENSE E DA SÚA INCLUSIÓN NO ORZAMENTO DE 2024.

D. Bernardo Varela López, do BNG, expón o contido da moción.

Non se producen intervencións e co voto favorable do BNG (1), e a abstención do Grupo Popular (5), do Grupo Socialista (3), de DO (1) e da deputada non adscrita, a comisión ditamina favorablemente a adopción, por parte do Pleno, do seguinte acordo:

1.- Que no vindeiro orzamento da Deputación, e tendo en conta os criterios de xa establecidos pola FEGAMP, se faga o reparto aos concellos da provincia a través dun plan único de

investimentos que se sitúe como mínimo en 1/3 do total do orzamento, como xa están a facer as restantes deputacións galegas.

2.- Que a Deputación suplemente no actual exercicio orzamentario 2023 a través do remanente existente, as partidas destinadas a cooperación cos concellos (plan provincial, plan de emprego, etcétera) dotándoas dos recursos necesarios para modificar as actuais cantidades de reparto ata situalas nuns índices semellantes ao resto das deputacións do País, con criterios obxectivos, xustos e equitativos.

3.- Que os recursos públicos, os recursos de todas e todos, se repartan de xeito obxectivo na procura dunhas mellores condicións de vida para os nosos conveciños e conveciñas.

5º.- MOCIÓN DO GRUPO SOCIALISTA PARA RECLAMAR A MELLORA DOS SERVIZOS FERROVIARIOS DE MEDIA DISTANCIA PRESTADOS EN GALICIA POLA ENTIDADE PÚBLICA EMPRESARIAL RENFE

D.^a Elvira Lama Fernández, do Grupo Socialista, expón o contido da proposta.

Non se producen intervencións e co voto favorable do Grupo Socialista (3) e a abstención do Grupo Popular (5), de DO (1), do BNG (1) e da deputada non adscrita, a comisión ditamina favorablemente a adopción, por parte do Pleno, do seguinte acordo:

1. Instar á Sociedade Mercantil Estatal Renfe Viaxeiros e ao Ministerio de Transportes, Mobilidade e Axenda Urbana á ampliación de frecuencias nas relacións ferroviarias de media distancia Avant prestadas entre A Coruña e Ourense, establecendo un novo servizo diario ás 21:00 horas en sentido A Coruña>Santiago>Ourense, co fin de suplir a ausencia total de relacións neste sentido a partir das 19:50 horas.

2. Instar á Sociedade Mercantil Estatal Renfe Viaxeiros e ao Ministerio de Transportes, Mobilidade e Axenda Urbana a atrasar ás 06:30 horas o tren Avant que sae da Coruña sentido Ourense ás 05:55 horas e a atrasar ás 15:30 horas o tren Avant que sae da Coruña sentido Ourense ás 15:10 horas, para poder ofrecer un servizo máis eficiente aos usuarios e usuarias que deben chegar ou regresar dos seus centros de traballo ou estudo.

3. Instar á Sociedade Mercantil Estatal Renfe Viaxeiros e ao Ministerio de Transportes, Mobilidade e Axenda Urbana a establecer novos servizos ferroviarios directos de media distancia entre Ourense, Pontevedra, Vilagarcía de Arousa e Vigo, aproveitando a nova liña existente entre Ourense e Conxo e o Eixo Atlántico, mediante a creación de seis relacións diarias en ambos os sentidos entre as provincias do sur de Galicia, evitando os transbordos en Santiago de Compostela, que penalizan a duración e eficiencia das viaxes actuais, pouco

competitivas fronte as circulacións por estrada, e sabendo do próximo peche por obras da liña convencional entre Ourense e Vigo polo río Miño, así como do avultado número de desprazamentos diarios que se producen entre ambas provincias segundo destapa a *big data* de mobilidade recompilada polo Mitma.

4. Instar á Sociedade Mercantil Estatal Renfe Viaxeiros e ao Ministerio de Transportes, Mobilidade e Axenda Urbana á ampliación de frecuencias en horario madrugador, nas relacións ferroviarias de media distancia prestadas entre A Coruña e Vigo, establecendo un servizo, en ambas as direccións, con saída ás 06:00 horas e outro ás 08:00 horas, co fin de atender a demanda real de persoas que comezan a traballar ou a estudar ao redor das 8 da mañá.

5. Instar á Sociedade Mercantil Estatal Renfe Viaxeiros e ao Ministerio de Transportes, Mobilidade e Axenda Urbana a mellorar a conexión de media distancia entre Ourense e O Carballiño, creando novos servizos e adaptando os horarios, na medida do posible, ás necesidades expostas pola Plataforma de Transportes do Carballiño.

6. Instar á Sociedade Mercantil Estatal Renfe Viaxeiros e ao Ministerio de Transportes, Mobilidade e Axenda Urbana a mellorar os servizos ferroviarios de media distancia entre Ourense e as comarcas de Lemos e Valdeorras, coa creación de novos servizos e recuperando o tren suprimido pola pandemia Vigo<>Ourense<>Monforte de Lemos<>Ponferrada<>León, aínda pendente de reimplantación.

7. Instar á Sociedade Mercantil Estatal Renfe Viaxeiros, á Entidade Pública Empresarial Administrador de Infraestruturas Ferroviarias (Adif) e ao Ministerio de Transportes, Mobilidade e Axenda Urbana, ao desenvolvemento dun plan de puntualidade para Galicia, que permita eliminar os atrasos que se producen na prestación de servizos ferroviarios de media distancia dentro da comunidade autónoma.

8. Instar á Entidade Pública Empresarial Administrador de Infraestruturas Ferroviarias (Adif) a realizar as actuacións e investimentos necesarios que permitan eliminar as limitacións temporais da velocidade (LTV), que provocan drásticas reducións da marcha na rede ferroviaria de Galicia, especialmente no Eixo Atlántico, e tamén á posta en servizo do sistema ERTMS entre Vigo e A Coruña e na liña Ourense-Santiago de Compostela na contorna desta última cidade, o que melloraría a eficiencia de todas as circulacións da rede galega.

9. Instar a Renfe ao aumento dos puntos de venda e atención presencial en Ourense (un máis), xa que só existen dúas xanelas nesta estación que aumentou a demanda de información e

venta presencial considerablemente nos dous últimos anos, tras sumar 1,8 millóns de usuarios e usuarias durante o ano 2022 e cunhas previsións de seguir incrementando considerablemente esta cifra.

8º.- MOCIÓNS DE URXENCIA.- Non se presentan.

9º.- ROGOS E PREGUNTAS.- Nesta quenda prodúcense as seguintes intervencións:

D. Bernardo Varela López, do BNG, formula as seguintes preguntas en relación coa xestión pública directa que se ten iniciado recentemente no Consorcio Provincial de Ourense para o servizo contra incendios e de salvamento, e indo por diante que o servizo funciona razoablemente, grazas sobre todo ao bo facer dos profesionais que integran o corpo, xórdennos algunhas cuestións que solicitamos sexan aclaradas: ¿a praza de director técnico, en que condicións se atopa? ¿Foi cuberta? ¿Ía ser cuberta e logo renunciaron a ela? ¿En que condicións se ía facer? ¿Respectábanse os criterios de igualdade, mérito e capacidade para a designación desta praza? ¿Respectaranse para a cobertura desta a partir de agoa? Se se estima a súa necesidade. ¿Cal é o organigrama de cada un dos distintos parques comarcais? ¿É posible que nun só parque, nomeadamente o da Rúa, existan oito cabos para nove bombeiros? ¿Existen mandos de garda fóra da xornada laboral fixa, para o caso de incidencias de alcance? ¿Consideran desde a responsabilidade política de xestión, isto un organigrama lóxico para o bo funcionamento do servizo? ¿Existe un sistema de provisión de ascensos na escala profesional de bombeiros, con características equitativas de igualdade, mérito ou capacidade? De non ser así ¿vai ser provisto en breve?

O **presidente da comisión** contesta que a oferta de emprego público extraordinaria para estabilizar o emprego temporal do Consorcio provincial de Ourense para a prestación do servizo contra incendios e salvamento, foi aprobada por Resolución 2022/0005, ditada o 13/5/2022, (BOP núm. 113 do 19 de maio de 2022 e anuncio publicado no DOG núm. 105 do 2 de xuño de 2022), todo isto de conformidade co establecido na Lei 20/2021, de 28 de decembro, de medidas urxentes para a redución da temporalidade no emprego público. (expediente 2022/5755S). Seguindo coas previsións da Lei 20/2021, do 28 de decembro, de medidas urxentes para a redución da temporalidade do emprego público (BOE do 29 de decembro de 2021) corresponde a aprobación de convocatoria e bases da oferta de estabilización antes do 31 de decembro de 2022. Reunida a Mesa de Negociación do Consorcio provincial de Ourense para a prestación do servizo contra incendios e salvamento, o día 22 de decembro de 2022, onde se someteu a informe e consulta o proxecto de bases

reguladoras e convocatoria dos procesos selectivos para a provisión das prazas incluídas na oferta de emprego público extraordinaria para estabilizar o emprego temporal do Consorcio Provincial de Ourense para a Prestación do Servizo contra Incendios e Salvamento, acadouse, na citada reunión, un acordo para aprobar a devandita convocatoria e bases. O acordo alcanzouse co voto favorable de todos os membros presentes na Mesa de Negociación, isto é, o presidente do Consorcio Provincial, e por todas as organizacións sindicais presentes (CSI-F, CCOO, e CIG), engadíndose modificacións ao texto inicial. Por Resolución da Presidencia núm. 2022/14738, do 23/12/2022, publicado no BOP núm. 295, do 27/12/2022, aprobáronse as bases reguladoras e a convocatoria da oferta de emprego público extraordinaria para a estabilización do emprego temporal do Consorcio provincial de Ourense para a prestación do servizo contra incendios e salvamento. Contra as citadas bases presentáronse recursos que obrigaron á súa paralización e están na actualidade pendentes de resolver. Durante o prazo da convocatoria presentáronse dúas solicitudes para a praza de director técnico. Respecto ao organigrama dos distintos parques responde que ao producirse a subrogación en datas moi recentes se asumiu o enviado pola empresa e que concretamente no Concello da Rúa se compón por dun sarxento, 8 cabos e 9 bombeiros. En todo caso engade que este organigrama se intentará revisar a través dun instrumento de ordenación de persoal, pero lembra as limitacións que existen da subrogación a relación laboral que os traballadores tiñan coa empresa. Respecto á atención das incidencias as xornada laboral fixa explica que se chegou a un acordo cos traballadores pero que ten que ser tratado na mesa xeral de negociación e referendado polo órgano competente do Consorcio, xa que estamos nunha administración pública agora e non na empresa privada, e isto algúns traballadores do Consorcio o entenderon pero outros parece que aínda non. Ata que se consiga formalizar o dito acordo é o xerente o que está asumindo estes traballos. Respecto ao sistema de provisión de ascensos aínda non existe e volve lembrar as limitacións existentes pola subrogación das relacións laborais. Finaliza indicando que se produciu no proceso de subrogación de todo o persoal do consorcio cumpríndose os compromisos adquiridos por esta Deputación e que o paso á xestión directa se está facendo dun xeito ordenado e lembra que outras deputacións de Galicia que o comezaron xa hai anos e aínda non o finalizaron.

D.^a Rosario Rodríguez Delgado, do Grupo Socialista, pregunta se unha vez producida a subrogación do persoal e o paso á xestión directa continúa a folga dos traballadores do servizo de extinción de incendios do consorcio..

O **presidente da comisión** contesta que a folga se mantén en vigor e que non afecta a todos os parques do consorcio e tampouco á prestación do servizo xa que os servizos mínimos establecidos recollen todos os servizos realizados coa extinción de incendios. Engade que a el lle parece unha postura estraña o de manter a folga cando se produciu xa o paso á xestión directa do consorcio, pero que o dereito a folga é un dereito que teñen os traballadores.

E ás 18.30 horas dáse por finalizada a reunión, redactándose a presente acta que se asinará electronicamente. Dou fe.